

PREDGOVOR

Bibliografija je uvijek relevantno predstavljanje prošlog znanja – znanja koje je publikovano u raznorodnim formama publikacija. To znanje biva popisano, bibliografski opisano i predstavljeno na jednom mjestu, tako da sadašnje znanje uvijek nosi prošlo, bilo kao interpretaciju ili reinterpretaciju postojećeg, takođe publikovanog znanja (Dizdar, Senada. Slika prošlog znanja. Bibliotekarstvo. 1998-2001; (43-46): str. 119).

U svijetu je odavno poznata praksa izrade bibliografija naučnih i stručnih radova iz raznih oblasti naučnog stvaralaštva. Ovakvi, više ili manje sveobuhvatni, pregledi svih objavljenih naslova iz određene naučne oblasti imaju višestruki cilj. Prvo, oni daju pregled aktuelnog stanja i dostignuća koje je ostvareno u određenoj oblasti društvene djelatnosti. Drugo, oni predstavljaju izraz naučne zrelosti određene države, posebno “mladih” država formiranih krajem 20. vijeka. Treće, oni predstavljaju relevantan putokaz u kom pravcu dalje može i treba da se razvija određena naučna oblast. Konačno, oni su od velike praktične i upotrebne vrijednosti svim licima koja se u teorijskom i praktičnom pogledu bave određenom oblašću naučnog djelovanja jer iz njih dobijaju saznanja o tome gdje i koje radove, s kojim temama, u kojem obimu i kojim načinom obrade mogu da se upoznaju. Uostalom, to je i od velike pomoći svim univerzitetskim i drugim naučnim radnicima kako da na najbrži, najlakši i najpristupačniji način dođu do osnovnih saznanja o relevantnim radovima koji su objavljeni iz ove oblasti. Uz to, bibliografije nisu samo korisne, nego i neophodne svakoj naučnoj oblasti i predstavljaju osnovno polazište za naučne analize.

U pogledu pravnih nauka, značaj postojanja bibliografskih radova je posebno istaknut. Tim prije jer se radi o jednoj dinamičnoj oblasti koja prati društvene tokove i promjene, pokušavajući dati okvire i putokaz razvoju društva u cjelini u kontekstu pravne države i institucije pravnog poretka. Međutim, iako je danas nedvosmisleno utvrđen veliki teorijski i praktični značaj izučavanja brojnih pravnih pojmova i instituta, još uvijek se tek sporadično pristupa ozbiljnijem sagledavanju dostignuća pravne nauke uopšte, a posebno pojedinih pravnih oblasti. Na taj način u Bosni i Hercegovini do sada nije postojala bibliografija, ne samo krivičnog prava, već ni opšta pravna bibliografija, iako se takva potreba odavno osjećala i u nauci i u praksi.

Imajući u vidu iznesene razloge, autori su se prihvatili značajnog, obimnog, ali istovremeno i nezahvalnog posla da na uobičajeni način prirede “Bibliografiju krivičnog prava Bosne i Hercegovine”, prvu i jedinstvenu ove vrste, težeći da na jednom mjestu pregledno izlože sva objavljena izdanja iz svih oblasti krivičnog prava

(materijalnog, procesnog i izvršnog), drugih oblasti kaznenog prava (privrednog prestupnog i prekršajnog, odnosno administrativnog kaznenog prava), kao i srodnih disciplina (pravnih, vanpravnih i pomoćnih krivičnih nauka). Tako su na ovom mjestu objedinjeni: udžbenici, priručnici, praktikumi, monografije, komentari zakona i drugih propisa, zbirke zakona, naučni i stručni radovi i referati na naučnim i stručnim savjetovanjima i simpozijumima prema kriterijumu da je izdavač na teritoriji Bosne i Hercegovine, odnosno da se radi o naučnom skupu koji je organizovan u Bosni i Hercegovini, kao i da je autor iz Bosne i Hercegovine. Na taj način, na ovom mjestu izloženo je po abecednom redu ukupno 3.508 bibliografskih referenci koje su napisali brojni autori, počev od prvog objavljenog rada daleke 1914. godine (Franjo Kruszelnicki), zaključno s 2014. godinom – dakle za prvih stotinu godina postojanja i razvoja krivičnog prava Bosne i Hercegovine.

Naravno, težnja da se na jednom mjestu pregledno obuhvati cjelokupna krivičnopravna naučna misao Bosne i Hercegovine uvijek povlači problem da li su autori uspjeli da istraže svu objavljenu literaturu ili je, pak, neko djelo ostalo nezabilježeno. Autori su svjesni da će neki radovi ili autori zbog nedostupnosti ili nekompletnosti izvora ostati izostavljeni iz ovog izdanja. Međutim, svaki dobronamjerni prijedlog u smislu dopune ovog izdanja će naići na razumijevanje autora i naći svoje mjesto u sljedećem izdanju ove bibliografije.

Na kraju Bibliografije dat je autorski i predmetni registar koji sadrži pojmove izložene po prezimenima i imenima autora, odnosno po ključnim institutima i pojmovima koji su obrađeni u pojedinim bibliografskim jedinicama, kao i Registar monografskih i serijskih publikacija korištenih za izradu Bibliografije. To omogućava svakom korisniku da na relativno jednostavan, lak i brz način pronađe radove koji se odnose na predmet njegovog interesovanja.

Izdavanje ove knjige ne bi bilo moguće bez svesrdne pomoći gospođe Arijske Džanović, stručnog saradnika – bibliotekara u Biblioteci Ustavnog suda Bosne i Hercegovine. Ona se pobrinula za ažuriranje teksta, predlažući argumentovano šta će se iz prvobitnog teksta izostaviti ili zamijeniti novim. Stoga je u velikoj mjeri zaslužna za knjigu koja je pred čitaocima.

Sarajevo, 15. septembar 2015. godine

Autori